

Lingzyinz: Sam Nyied Gizgiz Sing Fwen Rwenz

凌云: 三月无处不飞歌

Seizcin sam nyied, roeg heuh va hom. Mboengneix, Lingzyinz Yen Swewngz Cin Beilungj Yauzcuz ginzung gag cujiz gawjbanh hoihfwen, eu fwen gyau youx, eu fwen cienz cingz, eu fwen senhconz doxhuz doxndei, coicaenh le minzcuz doxgiet fazcanj, sawj minzcuz cingzgeih engqgya naekna.

Beixnuengx Yauzcuz Beilungj youq gwnz bya ndaw rungh, minzfungh minzsug gig miz daegdiemj, mehmbwk daenj buhvaq vava loegloeg, saek gig ronghsien, bouxsai buh dinj vaq raez, saek moqsag. Saimbwk beixnuengx Yauzcuz Beilungj maij dox cunz mbanj cunz ranz, eu fwen gyau youx, eu fwen guhcaemz, gij minzcuz vwnzva daegsaek noengznwdnwd haenx sawj vunz yawj le cungj lumz mbouj ndaej. (Siuh Fazlingz)



▲Bouxcoz saimbwk doiq fwen mizyinx lai.



▲Bouxcoz saimbwk youq laj godauz doiq fwen.



▲Gwnz hoih cietcaemgvej vunz lai vunz daih.

Denhgoz:

Cietcaemgvej Hozdung Ndei Yawj Lai

天峨: 蚂拐节活动精彩纷呈

Gyong laz yiengj daenh mbwn, loxlez rwenz doh biengz. 3 nyied 2 hauh, angqhoh cietcaemgvej hozdung youq Denhgoz Yen Mbanjnazdoengh gawjhengz. Cietcaemgvej hozdung dwg “Bi 2015 Denhgoz Ciet Dahhoengz Vwnzva Lijyouz” ndawde aen hozdung youqgaenj ndeu. Hozdung ngoenzde, miz song fanh lai vunz daeuj yawj.

Denhgoz Yen Mbanjnazdoengh dwg dieggoek Dahhoengz Bouxcuengh caemgvej minzsuz vwnzva. Caemgvej minzsuz vwnzva cienziep caeuq henhoh, youq rangh Dahhoengz guh ndaej cei q ndei. Cienzgeiz daeuj, moix bi ndwencieng coit daengz cibngux, vunz dangdieg couh gag cujiz guh cietcaemgvej minzsuz vwnzva hozdung, souj gitleih, gouz ndaw bi moq rumz swnh raemx cuk, gohaeux baenzsou. (Vangz Yenzsungh)



▲Cietcaemgvej minzsuz byaujyenj—foux-vunznyingz.

Lungzlinz:

Cietdiuqbo Myauzcuz Yienj Cingz Minzcuz Doxgiet

隆林: 苗族跳坡节演绎民族团结情

Moix bi ndwencieng coit daengz cibroek, dwg seiz cietdiuqbo Lungzlinz Gak Cuz Swciyen Myauzcuz beixnuengx. Diuqbo, eiqsei dwg youq ndaw nywj ndaw va seizcin youzbyaij, byaij gwnz bo guhcaemz, yiengjsouh gij gyaundeidei daswyenz, cietdiuqbo dwg aen ciet conzdungj beixnuengx Myauzcuz ndeu.

Youq duenh seizgan ngoenzciet neix, gyoengq beixnuengx Myauzcuz daenj

buhmoq vaqmoq, dajcang gyaundeidei dangqmaz, daj gak dieg daeuj “hwnj bo”, doxcomz youq gwnz cienzbo, guh bin ganjbo, boqvenz diuqfoux, gaiqdaenj doxdax daengj hozdung, angqhoh ngoenzciet, nauhyied dangqmaz. Gizgiz cungj yienh’ok minzcuz fungcingz noengznwdnwd, yienh’ok gij cingzgeih naekna gak minzcuz doxgiet haenx.

(Vangz Haijgez)



▲Bin ganjbo.



▲Yienj boq venz.

Yungzsuij: Ndaemfaex Cang Gyaeu Aenmbanj Raeuz

融水: 植树美乡村

3 nyied 12 hauh, Yungzsuij Myauzcuz Swciyen gaihcanj “daengxcungq ndaemfaex caux ndoeng • caezgya laebguh swnghdai lajmbanj” nem 3.12 ndaemfaex caux ndoeng hozdung. Gyoengq gihgvanh ganbu caeuq gyoengq ginzung lajmbanj hwnj bo bae ndaemfaex, daihgua cungj vihliux dajcang gwnz bo, dajcang lajmbanj, sawj lajmbanj engqgya gyaundeidei roengzrengz bae guh. Ndaw doz dwg gyoengq vunz lai youq gwnz Daujvadauz Mbanjsihdung nyaengq ndaemfaex.

(Liu Swjyenh /廖子渊)

